



Um-crap sil pass Tumegl



FOTOS MAD La Val Stussavgia ei dotada cun ina varionta flora e fauna.

Art ella cuntrada naturala dalla Val Stussavgia

Project da pilot per ina Academia «Land Art» en Val Stussavgia

DA MARTIN CABALZAR

■ En otg luvratoris elavuran students e docents digl entir mund ovras d'art ella cuntrada. Quei succeda el rom dil project «Alps Art Academy» en Val Stussavgia. La Pro Safiental vegn a presentar ils resultats da quei project da pilot da lavur artistica ella cuntrada el decuors da quest atun alla publicitad. Cun quei project vulan ils iniziants presentar la Val Stussavgia, plidentond in publicum pli vast sigl entir mund. Ils participonts vulan prender cun els en lur patria las experiencias fatgas, aschia ch'il project ha in scop dubel, numnadamein la promoziun digl art e dil turissem. All'ocasiun dalla vernissascha che ha liug ils 2 da fenadur vegn la publicitad envidada d'observar ed urentar las ovras d'art. Ina publicaziun en fuorma d'ina carta da viandar meina ils visitaders tier las singulas ovras d'art colligiadas en ina reit e cuorts texts dattan sclariment davart igl andament da creaziun e davart la muntada e simbolica dallas singulas ovras ed entginas indicaziuns davart la biografia digl artist. Ultra da quei ei vegniu installau el hotel Alpenblick a Tenna in center d'informaziun cun ina pintga biblioteca davart igl art ella cuntrada.

Quater luvratoris durant questa stad
Tenor il concept digl artist Johannes Hedinger duessi dar mintg'onn ina

«Alps Art Academy» che porscha plirs luvratoris tier il tema «Land Art» per artistas ed artists da provegnientscha internaziunala. L'emprema seria da luvratoris ei gia planisada per questa stad. Ils singuls luvratoris vegnan mintgamai dirigi da dus artists, in svizzer ed in digl exteriur. Sco participonts vegnan plidentai primarmein studentas e students d'art sco era giuvnas e giuvens artists digl entir mund. Ils luvratoris cuozan ina jmana ed han la finamira da crear silmeins duas ovras d'art en Val Stussavgia. Ei setracta d'ovras d'art repartidas sin l'entira Val Stussavgia che pon puspei svanir suenter cuort temps ni era da talas che restan visiblas per plirs onns.

Dialog denter art, natira e cuntrada
El center da quella academia d'art ella cuntrada stat il dialog intensiv denter art, natira e cuntrada. Tematisai, reflectai e sviluppai vinavon vegnan differents aspects tematics e medials che pertuccan igl art contempran ella cuntrada. Qualas ein las novas tendenzas digl art dalla cuntrada el spazi public, seigi quei architectonic ni social. Anlaisai ed evenimentai vegnan connexs el context cun autras medias sco era el dialog culla societad. In cuors s'occupa culla historia e culla teoria da quella sparta specifica digl art, in ulterior ei dedicau alla recezziun ed all'intermediaziun d'art.



En Val Stussavgia vegn ins en buca ditg adina puspei a fruntar sin ovras d'art ella cuntrada.

Tenor Hedinger s'impona la Val Stussavgia per plirs motifs per in tal project sco «Land Art». La cuntrada genuina ed autentica cun sias spundas teissas, sia greppaglia selvadia e l'imposanta cavorgia dil Rein (Ruinaulta) suggereschon natira intacta ed ein premisas inspirativas per la lavur artistica. Vidlunder vegn che la Stussavgia ei culturalmeins aunc buca surcargada. Sper

las activitads numerusas e variontas dallas uniuns ed il manteniment dil patrimoni cultural dils Gualsers dat ei spazi avunda per il niev. L'aviartadad dalla populaziun per projects innovativs accentuescha era il president communal Thomas Buchli: «Las artistas ed ils artists vegnan a luvrar cun nossas resursas, culla cuntrada e culla natira. Quei sa svegliar niev potenzial d'innovaziun cul qual nus savein luvrar vinavon».

Pro Stussavgia sco purtadra
Purtai vegnan il project «Alps Art Academy» e l'exposiziun d'art el liber dall'uniun Pro Stussavgia. Ella s'engascha per in svilup persistent dalla vallada ellas domenas cultura, artisanadi, agricultura e turissem. Operativamain vegn il project menaus da Jolanda Rechsteyner, la gestiunara dalla Pro Stussavgia. La Pro Stussavgia vul s'engaschar per il beinstar e beinesser dalla vischnaunca da Stussavgia che cumpeggia sper Stussavgia e Tenna era Versomi e Valendau. Per contonscher sias finamiras vul la Pro Stussavgia cooperar cun ils differents acturs. Ella vul era sensibilisar la populaziun per ils basegns dalla regiun, porscher agid da segidar sesez e segidar tier la finanziaziun da projects. L'uniun iniziescha e realisescha mesiras ch'ei empalontas per la regiun, sustegn ideas ed accumpogna projects da personas privatas che derivan dalla vischnaunca da Stussavgia.

Experiment cun potenzial persistent

Il bab dall'idea e menader artistic dil project ei igl artist e scienziat d'art Johannes M. Hedinger. El ei perschua dius: La «Alps Art Academy» ed igl art ella cuntrada naturala dalla Stussavgia hagian bia potenzial e seigien concepiti a moda persistenta. Malgrad quei seigien els in experiment ed in labor, damai ch'ins lavuri per part ensem cun artists nunenconuschents. Denton gest quei promovì dialogs fritgeivels e plein tensiun. En scadin cass selegrì el dallas diversitads e dalla collaboraziun transculturala da 30 participonts ord rodund 20 naziunalitads. Per entgens participonts ha la «Alps Art Academy» saviu intermediar stipendis per aschia facilitar lur participaziun. Tgei capeta sche tons artists creeschon da cuminonza art? Tgei influenza ha la Val Stussavgia sin els e tgei effect han lur projects sin la Val Stussavgia? E co vegn igl entir project a vegnir recepius el ravugl d'artists, dalla populaziun indigena e dils visitaders e hospis dalla Val Stussavgia? Da quella accoglientescha vegn ei la finala era a depender en tgei periodicitad che la «Alps Art Academy» e las exposiziuns sut tschiel aviert vegnan ad haver liug egl avegnir.

Informaziuns actualisadas permanentamein sin www.alpsartacademy.com



Johannes Hedinger, il menader da project dad «Alps Art Academy».



Il president communal Thomas Buchli fa il pur cun sia famiglia a Tenna.